

TARIKH: 2/6/23
SURAT KHABAR: Berita Harian
MUKA SURAT: 6

Syor tawar gaji menarik doktor, jururawat di Johor

Johor Bahru: Kementerian Kesihatan (KKM) dan Jabatan Perkhidmatan Awam (JPA) disaran menawarkan skim ganjaran dan tangga gaji lebih menarik untuk doktor dan jururawat di negeri ini.

Pengerusi Jawatankuasa Kesihatan dan Perpaduan Johor, Ling Tian Soon, berkata ia susulan isu kekurangan doktor dan jururawat yang serius, termasuk sektor swasta susulan memilih berkhidmat di Singapura.

Katanya, penghijrahan doktor

dan jururawat dari Johor menyebabkan hospital utama terutama Hospital Sultanah Aminah (HSA) dan Hospital Sultan Ismail (HSI) di sini, mengalami isu kekurangan doktor dan jururawat yang serius.

"Justeru, kita mencadangkan KKM dan JPA menawarkan skim ganjaran dan tangga gaji lebih menarik untuk doktor dan jururawat yang berkhidmat di negeri ini.

"Penhijrahan doktor dan jururawat di bandar raya ini mem-

beri kesan terhadap perkhidmatan serta rawatan kepada pesakit.

"Johor kekurangan 2,800 kakitangan kesihatan, membabitkan 2,120 doktor dan 680 jururawat.

"Kekurangan staf kesihatan menjejaskan klinik pakar HSA yang merekodkan 1,800 janji temu pesakit sehari manakala 1,900 janji temu klinik pakar di HSA yang kini mengalami kesesakan.

"Ia juga menjejaskan rawatan di Unit Kecemasan dan Trauma

HSA dan HSI yang puratanya menerima antara 400 hingga 600 pesakit sehari," katanya.

Beliau berkata demikian pada sidang media selepas pelancaran sambutan Hari Jururawat Antarabangsa peringkat Johor yang disempurnakan Menteri Besar, Datuk Onn Hafiz Ghazi, semalam.

Pada 25 Oktober 2021, *BH* pernah melaporkan Malaysia bakal kehilangan ratusan doktor dan jururawat berikutan tindakan beberapa hospital di Singapura

menawarkan kontrak lumayan dan insentif menarik untuk mereka bekerja di negara itu.

Tawaran bekerja di rangkaian hospital awam republik itu dikatakan menarik minat ramai doktor dan jururawat negara ini untuk berhijrah, khususnya dalam kalangan mereka yang masih berstatus kontrak ketika ini.

Antara faktor yang mencetuskan minat mereka ialah tawaran gaji sehingga mencecah 10 kali ganda berbanding gaji yang diperolehi di negara ini.

BH: Nasional ms 6 2/6/23